

L'ala radicala da la refurmaziun


Il destin da l'anabaptissem e dals anabaptists en il Grischun

■ Enturn il 1525 han appartegnì ils anabaptists grischuns Georg Cajakob (Jörg Blaurock) ed Andreas Castelberger al circol da Felix Manz e da Konrad Grebel a Turitg. Il stampadur Cajakob fascheva per Zwingli il currier tranter Turitg e Basilea. Omadus èn la finala vegnids bandischads da Turitg ed han empruvà da derasar en il Grischun questa furma radicala da la refurmaziun. La lescha davart la libertad da cretta dal 1526 dueva però excluder autras confessiuns, spezialmain la «secta» dals anabaptists. Uschia n'han ins era betg tolerà en il Grischun las activitads dals anabaptists indigens ed ins ha scumandà ad els da pregiar lur cretta. Il moviment dals baptists ha tuttina mantegnì fin l'entschatta dal 17avel tschientaner in tschert dumber dad aderents, e quai surtut tras ils fugitivs per motivs da cretta provegnints da l'Italia e dal Tirol.

Anabaptissem

Moviment collateral da la refurmaziun, fundà oriundamain da discipels da Zwingli ch'eran s'organisads il 1524/25 per protestar cunter las innovaziuns memia pauc radicalas da lur maister. Ils anabaptists postulavan ina baselgia, a la quala la communitad pudeva participar voluntarain ed en la quala ils fidaivels avevan da resguardar sulettamain las leschas divinas da l'Evangelii e quellas da la Pregia sin il munt. Commember da la Communitad anabaptistica dals songts pudeva daventar be quel ch'era sa convertì e ch'aveva confermà quai cun sa laschar battegiar (batten dals creschids). La Sontga Scrittura era impegnativa per la vita sociala ed economica dals anabaptists. Els refusavan perquai l'instrucziun ecclesiastica, la baselgia statala, il batten d'uffants, l'impegn da l'urden statal, l'engirament visavi las autoritads ed il servetsch militar. Tant ils refurmads e luterans sco era ils catolics consideravan e persequitavan perquai ils anabaptists sco secta spiritualistica ed eretica.

L'anabaptissem era sa derasà a partir da Turitg sur las Alps fin en il Tirol, la Moravia, la Germania dal Sid e l'Ollan-



A las disputaziuns d'anabaptists a Turitg (1523–25) èn er sa participads ils dus Grischuns Georg Cajakob ed Andreas Castelberger.

da. A Turitg eran activs oravant tut Konrad Grebel († 1526) e Felix Manz (najentà il 1527 en la Limmat). L'emprim anabaptist activ a Turitg è però stà il Grischun Andreas Castelberger (dapi il 1522). Ad el era s'associà il 1525 Georg Cajakob, alias Jörg Blaurock, da Panaduz.

Exiliads da Turitg, èn Castelberger, Cajakob e Manz sa domiciliads il 1525 a Cuira, nua ch'els han proclamà, a l'entschatta cun success, lur cretta. Alura han però il burgamester ed il cussegl da Cuira cumenzà, ensemen cun il plevon da la citad Johannes Comander, a cumbatter ils anabaptists. Manz è vegnì expulsà a Turitg e Blaurock han ins mess en praschun, da la quala el ha dentant pudì fugir. Il 1526 ha glieu a Maiavilla ina dregira penala cunter numerus anabaptists. Wolfgang Schorant, alias Ulimann, in

ulteriur Grischun, ha pudì mitschar da la sentenza tras fugia ed è daventà il chau dals anabaptists songaglias (executà il 1528 en la Svevia). Anc il 1528 missiunava Castelberger cun fervenza a Cuira; pli tard n'han ins dentant pli udì nagut dad el. Cajakob è sa rendì en il Tirol dal Sid, nua ch'el è vegnì executà il 1529 sin il schafot a Klausen, suenter avair scrit en praschun ina chanzun da cumià commovent.

Supprimids durant decennis, èn alura ils anabaptists puspè cumparids cun ils fugitivs da cretta talians, immigrads en las Trais Lias enturn il 1550. Sin iniziativa dal plevon da la citad da Cuira, Tobias Eglì, ha la Dieta decretà il 1570 in scumond per anabaptists, arians ed auters eretics a Clavenna, a Plür ed en Vuclina, admettend sulettamain la confessiun evangelica e quella roman-catolica. Il 1577 ha la Sinoda da Cuira approvà ina posiziun redigida da Durich Chiampell en favur da la «vaira cretta cristiana» e cunter ils anabaptists u libertins. Ina gruppa d'anabaptists, manada da Leopold Scharnschlager (scolast a Glion, oriund dal Tirol, † ca. 1563), è stada activa en la segunda mesadad dal 16avel tschientaner a Glion e conturns. Anc enturn il 1600 era l'anabaptissem relativamain derasà en questa regiun. Steffan Gabriel, plevon a Glion, ha rapportà il 1605 ch'el haja triumfà en ina gronda reuniun dal pievel en la Lumnezia sur dus anabaptists en preschientscha da sis plevons.

Martin Bundi

Georg Cajakob

* ca. 1491/92, † 6 da settember 1529 sin il stgandler a Klausen (Tirol dal Sid), da Panaduz, numnà era Jörg Blaurock, Jörg il Ferm u Paulus II. Figl da purs. Seminari da spirituals a S. Gliezi/Cuira. Studis a Lipsia 1513. Plevon a Trin 1516–18. Cajakob è s'associà a la refurmaziun ed è sa domicilià cun sia dunna Elsa a Turitg l'entschatta dal 1525. Ils 21 da schaner 1525 ha el retschavì a Zollikon/ZH il batten anabaptistic tras Konrad Grebel. Il surnum Blaurock ha Cajakob obtegnì suenter ina disputaziun davart la religiuin a Turitg, durant la quala el ha purtà in mantè blau.

Per propagar l'anabaptissem ha el missiunà a Turitg, alura en l'Appenzell, plinavant a Basilea, Berna e Bienna, en il Tirol e – malgrà il scumond da l'anabaptissem il 1526 – adina puspè era en il Grischun. Sia missiun è stada accompagna da d'arrestaziuns, exiliaziuns e torturas. Dues chanzuns da Cajakob èn conservadas en il cudesch da chant anabaptistic «Ausbund».

Ulrich J. Gerber

Il cudesch da chant «Ausbund» – en dievier tar ils anabaptists dal 16avel tschientaner fin oz – cuntegna duas chanzuns da Georg Cajakob.

Andreas Castelberger

Attestà tranter il 1516 ed il 1531, dal Grischun. Anabaptist. In impediment corporal al ha purtà ils surnums dad Andres auf den Stülzen ed Andres il Zop. Castelberger è stà librari a Turitg, nua ch'el ha vivi cun la famiglia. Il 1516 è el menziunà per l'emprima giada en la corrispundenza da Zwingli. Intimà d'aderents radicals dal refurmatur, ha Castelberger dirigì ina scola biblica laica prosperanta per il studi da la Brev als Romans, fin ch'il cussegl da Turitg è intervegnì. Cunsignatari da las duas brevs a Thomas Müntzer, redigidas il settember 1524 dals Turitgais dal circol dals anabaptists ed autur d'ina brev (sparida) ad Andreas Karlstadt. Il schaner 1525, cura ch'els anabaptists esters èn vegnids bandischads da Turitg, ha Castelberger obtegnì per sai e per sia famiglia ina prorogaziun causa si'invalidad. Per il displaschair da Johannes Comander, refurmatur a Cuira, ha Castelberger propagà da l'exil las ideas anabaptisticas en il Grischun. Il 1531 ha el acquistà il dretg da burgais da Cuira.

Ulrich J. Gerber

Sebastian Hofmeister

* ca. 1494 a Schaffusa, † 9 da zercladur 1533 a Zofingen/AG. Figl d'in roder naturalisà a Schaffusa (1484). ∞ 1523 u 1524. Studi da teologia a Paris, dr. teol. Activ a Turitg, Constanza e Lucerna. Suenter l'expulsiun da Lucerna per avair aderì a la refurmaziun, è el sa transferì a Schaffusa il zercladur 1522. Hofmeister tgrava stretgs contacts cun Zwingli, Oekolampad, Vadian e Myconius, ma era cun ils anabaptists. Predicator al Fraumünster a Turitg a partir dal november 1525. Delegà il 1526 da la baselgia da Turitg e da Zwingli a la Disputaziun da religiuin a Glion, da la quala el è però vegnì exclus. Ses rapport da quella è dentant in funtauna impurtanta.

Adolf Collenberg

Franciscus Niger

* ca. 1500, † ca. 1563, da Bassano del Grappa (Venezia). Ses vair num talian era Francesco Negri. Pader benedictin da l'abazia da S. Justina a Padua. Già il 1524 ha Niger mussà simpatia per il lutheranissim. Tranter il 1529 ed il 1531 è el stà activ sco tessunz a Strassburg, nua ch'el è entrà en contact cun divers refurmatur. El ha maridà Cunegonda Regina Fessi. Il 1538 è Niger translocà a Clavenna, nua ch'el ha manà ina scola privata ed instrui las linguas classicas. Sco simpatisant da las ideas anabaptistas ed antitrinitaras ha el participà il 1550 al Concil anabaptist a Vaniescha. El ha scrit e translattà cudeschs da scola ed è stà autur

d'in catechissem tenor Martin Luther e dal pamflet «La tragedia del Libero arbitrio» che figurava en l'Index dal Vatican il 1559. Il 1547 è cumparida a Basilea sia «Rhetia sive de situ et moribus Rhetorum», in elogi umanistic, per part emfatic, da la libertad e da la toleranza religiuosa en il Grischun. Enturn il 1561–63 ha el vivi a Pinczów sper Cracovia, nua ch'el ha frequentà il circol dals exilants antitrinitars talians.

Martin Bundi

Johann Gantner

* ca. 1535 (a Cuira ?), † fanadur 1605, refurmà, da Cuira. Ordinaziun sacerdotala 1558. Plevon a Castiel fin il 1566, alura a la baselgia da S. Regula a Cuira. Il 1570 è el vegnì exclus da la Sinoda per avair simpatisà cun ils uschenumnads Schwenckfelder (sacramentars) ed ils anabaptists e per avair renvià ils dretgs stats en dumondas teologicas. Las Lias han insistì sin lur dretgs da controlla ed il Corpus evangelic ha elegì a partir dal 1571 in assessur (politic) en la Sinoda retica. Il 1586 è Gantner puspè vegnì recepì en la Sinoda ed è stà plevon a Maiavilla fin il 1596, alura a la baselgia da S. Martin a Cuira. Decan da la Lia da la Chadè 1591.

Adolf Collenberg

Confessiun retica

La gronda affluenza da fugitivs religius talians, persequitads da l'Inquisiziun romana, e las activitads dals anabaptists e



Sper anabaptists èn stads activs en il Grischun sacramentars, vul dir aderents dal spiritualissem refurmatoric da Kaspar Schwenckfeld.

d'autras «sectas» refurmatoricas han sfurzà la Sinoda retica da declarar impegnativs ils principis da la baselgia evangelica dal Grischun per mantegnair l'unitad ecclesiastica e confessiunala, tant pli che Pietro Paolo Vergerio pretendeva in'argna sinoda per ils refurmads da lingua taliana. Il 1552 han Johannes Comander e Philipp Gallicius formulà la Confessiun retica («Confessio Raetica»), entrada en vigur il 1553 suenter esser vegnida examinada ed approvada da Heinrich Bullinger. Per vegnir recepids en la Sinoda retica avevan ils predigtants da signar quella confessiun. La Confessiun retica, remplazzada già il 1566 da la Confessiun helvetica («Confessio Helvetica posterior») da Bullinger, cumpigliava 65 artitgels ed è vegnida publicgada pir il 1772 respectivamain il 1776 en la «Historia reformationis» da Petrus Dominicus Rosius a Porta. Las duas confessiuns èn vegnidas substituidas pli tard tras las uschenumnadas Determinaziuns reglamentaras.

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

